

太上老君說解釋呪詛經

爾時

太上老君在于闕國中仙度之所語尹喜曰  
上古之時人民淳朴心行正直稟性柔和不  
相嫉妬末世浮澆人心狡詐不修善行唯習

凶惡不奉大道倚托邪神作法呪詛專害人  
命是時尹喜真人稽首再拜上告

太上老君曰憫念蒼生沈淪下鬼冤被考劫  
鬼無伎倚願賜解脫之法使諸眾生免遭枉

橫

老君語尹喜曰汝當諦聽吾所說者切見中  
古之人專行厭禱便於天下地上邪鬼廟社

之中畫其形像書其姓名庚甲私竊呪誓以  
水噴灑以脚踏踏努目張口種種形勢專行  
無道枉害良善若自作若教他作者今受其

殃善男子善女人或被惡人呪詛厭禱者皆  
當香湯沐浴建立道場請三洞道士轉誦此

經功德不可思議其病即瘥若男若女被人  
呪詛便可解釋免沈身命奉請五方五帝部  
從兵馬各九百萬人為弟子恭於四面八方

上下中央剪除邪魅不祥之鬼令弟子福壽  
延長即說呪曰

大法堂堂 天圓地方 天有九柱 地有九梁

獸咒之人 自受其殃 六柱三梁 獸盡消亡

三梁六柱 還其本主 六甲六乙 獸盡速出

六丙六丁 獸盡不行 六戊六己 獸盡不起

六庚六辛 獸盡不具 六壬六癸 獸盡自死

呪詛速解 急急如律令

奉請三五將軍八風使者九州社令萬古將  
軍兵士百千萬眾追取獸盡五音之人三鬼

七鬼付北陰天獄呪詛惡人精鬼散越神志

猖狂頭破作七分一如律令

吾今所說解除呪詛厭禱經法若有善男子

善女人得聞此經為人轉誦救治病難度脫

眾災令得安樂身強體輕福壽延長永無災

障冤家債主速蒙消釋惡害驅除三屍墮落

得道成真時

老君而作偈曰

我昔遊中國 位登無上天 今來入竺國  
教化諸眾生 九十有六種 其中各有緣

今其敬信者 展轉自相傳 精進心不退  
得生無上天 有誦此經處 斯人壽命延  
百靈來護衛 萬病悉皆痊 見世得安樂  
身如金石堅 至真無上法 消災福自然  
太上老君曰無始以來諸仙聖眾救度群生  
便得安寧驅蕩妖邪解釋呪詛凶殃散滅吉  
瑞扶持是時大聖眾真歡喜踴躍咸願受持  
稽首叩頭作禮而退

太上老君說解釋呪詛經